

四庫全書

史部

欽定四庫全書

平定兩金川方略卷九十一

二月壬子阿桂色布騰巴爾珠爾奏言查登古對面之羅博瓦山峯巒起伏皆有賊人碉卡但高峯大卡之後尚有兩峯突起若派兵從登古了口潛繞其後於兩峯佔得一峯則羅博瓦高峯必不能死守而賊並失其喇穆喇穆之險惟此一帶山勢在在廻環灣曲賊既均可望見即可互為接應是

以臣等前已奏明酌定五路進兵因令福康安海
祿帶兵進攻喇穆喇穆迤西各碉普爾普等進攻
羅博瓦山峯碉卡特成額等於喇穆喇穆迤東山
腿進攻以牽賊勢其海蘭察額森特帶兵繞出羅
博瓦最後一峯對面地方以絕賊人來援又登古
了口之下有淖爾一處在羅博瓦及喇穆喇穆中
間令烏什哈達保寧等帶兵聯絡聲援十一日積
雪雖未全消而天色已經晴霽即於十二日亥刻

分隊起發兵丁皆由石罅循行或彼此以手接引
跳越而過比至黎明普爾普帶領侍衛栢凌等順
羅博瓦山梁而進將至碣下見碣外有伏賊即拋
擲火彈焚燒賊衆俱遁入碣我兵直抵碣下將往
來救應之賊殺死五名其福康安海祿攻喇穆喇
穆之兵又分兩隊前進搶獲石卡一座殺賊三名
其餘賊衆十餘名滾崖遁竄我兵乘勝進取第二
石卡卡內賊衆竄往喇穆喇穆高峯大碣官兵鎗

箭齊發擊斃數人其特成額成德六十六等帶兵
在喇穆喇穆迤東山腿上分為兩路牽綴亦擊殺
哨探賊衆數人維時海蘭察額森特帶兵行走處
處攀越賊已知覺將鎗砲排列於羅博瓦及喇穆
喇穆之上盡力施放並有潛伏林箐中用鎗擊打
者官兵毫無旁顧直前進發至第三峯下將循山
腿而登有賊二三百名從梁下壓海蘭察奮力迎
戰賊退一步我兵即進一步正在鏖戰間其山下

林中伏賊突出欲行衝截海蘭察留後之兵及額
森特烏什哈達保寧等所帶之兵合力迎擊賊人
來而復潰者兩次頃之又有三四百賊人分為三
股拚死衝突皆被擊敗約殲戮五十人帶箭逃
者尤衆此數次接仗箭最得力賊見官兵持弓追
趕者往往倒身抱頭從險崖滾落以冀倖生至海
蘭察等鏖戰之兵併力仰攻山勢愈上愈險尚有
積雪數寸且天已抵暮勢難搶佔當將兵暫撤與

額森特烏什哈達保寧等會兵一處分隊露處以
冀賊人前來偷刼可以再加殲戮而賊因日間痛
殲之故惟於遠處放砲並不敢近前侵擾此次殺
賊共計七十餘名而我兵受傷無幾惟侍衛庫爾
德受傷四川千總張魁陣亡現在查明咨部議卹
奏入

上諭軍機大臣曰阿桂等奏攻打羅博瓦山官兵奮勇
殺賊其中射斃者尤多可見滿洲索倫之得力惜賊

番每在碉內藏匿若能引出碉外使得益展我弓箭之利則更善耳此次進攻羅博瓦時官兵有從凍石中跳越而過者並有經賊人林內放鎗而官兵毫無旁顧其勞績茂著者甚衆實為出力可嘉著阿桂查明登記檔案俟攻得要隘時一併奏聞交部議叙其有出力超衆者即奏明以示鼓勵其陣亡之千總張魁及受傷之侍衛庫爾得等並著查明咨部辦理至於官兵之奮勇立功由於帶兵之將領董率得宜而

實由於將軍之規畫有方均堪嘉尚著賞阿桂荷包
四枚火鏈一件色布騰巴爾珠爾荷包三枚火鏈一
件福康安海蘭察普爾普額森特等四人各荷包二
枚火鏈一件烏什哈達保寧特成額海祿成德六十
六等六人各荷包一枚火鏈一件即隨報發往以示
獎勵至阿桂此次非但措置悉合機宜且胸有成算
志在必滅金川所籌悉與朕見昭合阿桂如此誠心
出力實不負元戎重寄朕適駐蹕盤山即以行程所

佩鏤文刮鯨囊解賜以寓一體聯合之恩眷

同日劉秉恬奏言

臣

於初六日自楸砥起程因途

次連遇大雪於十二日始至梭落栢古次日即赴
谷噶軍營詢悉將軍阿桂於十三日派令海蘭察
額森特等分道進攻雖未能得手而賊番衝出之
時被我兵殲戮甚多查谷噶軍營及海蘭察等駐
兵之處除每日支放外存米約及二千石復由梭
洛栢古逐日運進米三四百石實為源源而至有

盈無絀至楸砭新開道路該處糧運雖未能即日暢行而附之軍營之數站內尚存米一萬二三千石日隆臥龍關木坪等站約有米萬餘石亦足以資接濟其凱立業一路現由梭洛栢古每日接濟米數十斛至一百斛不等且臣昨在北路時見運往卓克采之米已有二三百石是該處亦斷無虞缺乏現在楸砭新路正關緊要其日爾拉山積雪轉瞬三月亦當漸次消融且該處夫糧漸集亦需

專員辦理臣擬於數日內仍回楸砥查辦一切奏
入報

聞

三月乙卯常青奏言

臣

奉將軍阿桂照會續調川

兵二千名一抵美諾布朗郭宗即於原留防兵內
更調一千五百名交將弁帶赴大營以資攻勦其
餘五百名查大板昭為西北兩路總匯之地應添
駐兵二百名又瑪爾當與大板昭互為聲援應添

兵一百名其薩拉一處附近兩河口新設糧站亦

當添兵五十名尚餘兵一百五十名令臣查現到

之兵已有撥添駐

臣

查現到之兵已有七百隨撥

綠營新兵四百分駐木波以滿兵三百撥駐布朗

郭宗將換出兵七百名交遊擊福敏泰帶赴大營

聽用其遊擊福敏泰所遺木波卡隘事務已派貴

州定廣副將握星泰等前往接管至美諾應換之

陝甘叅將金富寧帶兵三百名

臣

亦知會王進泰

就近截留新兵三百名作速更換起程餘俱照阿
桂所指撥兵添駐防守此外尚餘兵一百五十名
則於美諾分兵七十五名布朗郭宗分兵七十五
名添駐應用奏入報

聞

丙辰阿桂色布騰巴爾珠爾奏言查羅博瓦前面
山峯賊番恃險固守度大兵未必來攻而前此已
從其下繞道前進或疑大兵意不在此防備稍疎

亦未可定當於十七日夜派撥滿漢屯土官兵分
路前進海蘭察額森特帶兵從正路攻羅博瓦前
面山峯官兵奮勇前進直抵礮下賊番鎗石並發
其小金川降番先已潛繞賊礮之後始見又有一
礮相距甚近而兩礮中間又有一大石卡賊番聚
此以為應援兩礮之下我兵同土兵出其不意突
然搶入砍殺殆盡其有出卡逃竄者亦被官兵追
及共殺賊三十餘名前後官兵合力攻圍大礮拋

擲火彈挖掘碉根忽有賊二百餘來援經侍衛岱
三保達蘭泰等迎擊亦殲三十餘名餘賊入碉併
力固守其右手梁下又有賊二百餘斜冲而上亦
被章京瑚尼爾圖侍衛額爾特等迎擊斃賊十餘
餘賊潰遁臣等先恐官兵奮攻羅博瓦山峯碉卡
則後兩峯之賊喇穆喇穆之賊均必前來接應因
令烏什哈達保寧等帶兵從登古了口下至有綽
爾之處以斷來援至是果有賊百餘名從喇穆喇

穆一帶冲來欲截官兵後路經叅領常住遊擊李
煦督兵迎敵烏什哈達等亦乘勢夾攻賊番被殲
及落崖者甚衆其普爾普帶兵繞攻羅博瓦後了
口碉卡亦是派令章京索柱等從碉下山均繞
道襲取而自行帶兵迤邐斜上遇賊奮力衝擊賊
雖敗退仍於至險至仄路口滾石放鎗官兵相持
甚久而海蘭察等官兵在賊卡間攻撲者賊於兩
碉內鎗石並發刨挖碉根之官兵不無傷損難以

久站比至天色漸明各隊官兵緩緩撤下其福康
安海祿等帶兵由打木城對面喇穆喇穆高碉鎗
矢並施斃賊五六名至特成額成德等因各路官
兵進攻派令都司鄭啟榮帶兵由喇穆喇穆左手
山溝小路潛進自率侍衛伊里布等接應鄭啟榮
聞羅博瓦山峯打仗聲響帶兵先進直抵賊番冷
卡之前其中數賊俱被官兵殺死並獲活口一名
此次殺賊八九十名我官兵內惟章京索柱得有

石傷護軍校七十五我官兵內其餘兵丁亦有陣
亡受傷者俟查明咨部核辦現在天色已明臣等
另踴道路於一二日間奮速進攻以期深入

同日阿桂色布騰巴爾珠爾奏言查小金川地方
西起約咱東至大板昭河北一帶在在與金川接
壤其布朗郭宗底木達係美臥溝及簇拉角克出
路美諾係功噶爾拉出路僧格宗係當噶爾拉出
路現在俱有大兵分駐控制不為不密此時即偶

有夾壩不過去冬大兵未到之先小金川番人竄往金川者既無口食可資三五為羣潛行搶掠即加倍添兵駐守亦不能保其必無况南路摺報由打箭爐雅州而至省較由美諾挑關而至省僅多兩站臣等早已札知明亮等囑其所發摺報仍由打箭爐來往既無可虞而臣等摺報改由楸砭過行更為穩捷至谷噶馬尼兩路軍書往來由布朗郭宗美諾僧格宗遞送聲息俱可相通然此一路

本止四五百里而其間應加防範者亦不過數站
酌令兵壯黑夜暫停行走而日間加緊趲行亦不
至有遲悞均奏入

上諭軍機大臣曰阿桂等奏分路繞攻羅博瓦山峯情
形一摺深為嘉慰阿桂自進兵以來實心調度悉合
機宜軍聲倍壯所至奏績宣威佇盼成功茂膺渥典
其海蘭察所帶之小金川降番於攻碉時潛密先往
認真出力自應查明獎賞以勵其餘至滿洲索倫中

之奮勇殺賊及綠營屯土各兵有踴躍爭先者並應
確查具奏候朕另降恩旨將士等聞之自必更加感
激鼓舞其章京索柱護軍校七十五得有鎗石各傷
亦應查明與傷亡兵丁一併咨部核辦至另摺覆奏
籌辦後路事宜極為周妥看來此路乘勝深入大有
可恃而豐昇額籌攻凱立葉昨據奏稱踴有可通之
路此時如已攻得固好否則阿桂處一經攻克羅博
瓦山可以順勢壓下其凱立葉之賊自必不攻而潰

惟明亮一路欲進攻庚額特砲位業已鑄成未知施用後效驗何如又楚兵二千作何分派甚為懸憶著各將得勝情形迅速馳奏

戊午明亮富德奏言

臣

等屢赴庚額特對河砲臺

察看情形惟乘此河水未漲兵丁乘船逆流而上不過一箭遠近搶過庚額特東岸截出其前使賊番無險可恃即當不攻自破現已趕造皮船六十隻木船六隻預備臨期應用但河面本不甚寬賊

番兩岸拒守中流即有船隻未可直前徑渡必須
將河南喀咱普之賊碉二座庾額特山均之穆當
噶爾一帶碉卡用砲轟摧使之無處容身不能堵
禦我兵方可乘船而過十八日即移各種砲位緊
對穆當噶爾安設已將碉卡摧其大半並又趕鑄
大砲轟摧喀咱普碉卡兩處賊番稍退臣等即酌
量派兵衆從河南先渡一從河北直進勉勵兵衆
務期努力先登以期必克至奎林一路山頂積雪

漸消兵丁下山取水往返即須兩日多兵勢難久
駐惟查所佔山梁實為扼要有此一路官兵賊番
即不敢下從深嘉卜出而滋擾因留漢屯土兵一
千三百名在山防守其餘即令奎林撤赴深嘉卜
近水地方駐扎聽候調用連日以來賊人苦於砲
逼忽於二十一日黎明聚集二百餘人從庚額特
了口下趨滋擾我兵一聞賊至踴躍爭先當令侍
衛阿滿泰前鋒叅領巴克坦布等帶兵先佔要地

鎗矢刀矛同時並發賊番傷殪甚多現在楚兵二千接續來營將來攻過庚額特以前地勢平坦即當奮攻銳進況得此二千生力軍實可以壯聲援而助軍威奏入

上諭軍機大臣曰明亮等奏設法越險並現在殺賊情形一摺所辦甚好乘船渡河兩路並進自為得力如此即已越過庚額特之險攻克馬爾邦自為易事至奎林駐兵之處前據明亮稱此一路箐林深密自非

多兵接踵而前未可輕進或將所添楚兵二千併於奎林一路直壓斯第博堵進取克舟九寨似覺便捷著明亮等即就該處形勢妥酌為之至此次賊番竟敢從庚額特了口前來經阿滿泰巴克坦布等帶兵奮擊殲賊頗多甚為可嘉著存記檔案俟攻得馬爾邦一併奏請交部優叙

庚申阿桂色布騰巴爾珠爾奏言查羅博瓦一山最關緊要必當從此進攻始得建瓴之勢因於二

十三日派撥官兵乘夜陸續進發海蘭察達蘭泰等帶兵繞至第二第三峯丫口之下於黎明時分兵五股爬越而登賊番知覺集衆下衝勢甚勇猛官兵內雖有被滾石打中者並不稍為移動俟其相逼近之時持滿而發無不應弦即倒賊見我兵所佔地勢已與相等兩處夾攻勢不能支始行敗退我兵上緊追殺直上山梁海蘭察遂一面留兵佔據丫口礮下一面往搶第三峯第四峯及第四

峯下突起一岡將各碉卡盡行攻克並殲戮賊番甚多其額森特烏什哈達等兵接踵而至圍攻第二峯碉卡亦至晚克獲殲斃無遺賊衆因後路已斷轉竄入第一山峯碉卡合力死守先是額森特烏什哈達海祿等兵由淖爾一處接續前行突有賊百餘從溝內前來攔截章京花連保等帶兵迎擊其餘官兵前衝截殺將賊番圍住於山迴路轉之處殲戮更為不少餘俱竄入樹林兩卡內拒守

官兵三路合進進攻喇穆喇穆忽見碉後有賊數十欲往羅博瓦救援當即截殺數名餘皆竄逸至普爾普等所攻羅博瓦前面第一山峯碉卡我兵乘勝之後合力飛騰上撲拋入火彈噴筒或挖掘碉根或攀援而上於二十四日亥刻攻開賊除殲斃之外滾落崖溝及被火燒死者尤衆遂將四峯全克此次共克大碉八座大小二十六卡殺賊二百餘並大頭人阿讓星格申則二名亦均殺死查

喇穆喇穆係賊酋緊要門戶今將羅博瓦全行政
克已距遜克爾宗不遠原可直下衝壓但喇穆喇
穆之賊尚與勒烏圍有路可通則後路未清於糧
運往來亦須顧慮自應將喇穆喇穆之賊一併掃
除則各處防兵又可量撤為進剿之兵庶直壓遜
克爾宗聲勢倍為壯盛查羅博瓦對面山梁即係
喇穆喇穆後路臣等現擬發兵從此截斷勢必不
攻自潰

同日舒常奏言駐防木池叅將金應安稟稱二十
二日綽斯甲布土舍阿旺帶領土兵一千餘名潛
赴柔染爾地名攻奪碉卡查該處山勢陡險雪尚
未消土兵潛越攀援而上至丑刻土兵一半行抵
山頂賊番知覺一面在碉外迎敵一面在碉內放
鎗滾石土兵奮力殺賊數名餘皆奔竄隨將兩碉
攻獲生擒賊番二名殺死金川頭人衮噶喇卜坦
一名因其地無水泉難以駐守隨將二碉燒燬撤

回計陣亡土兵十二名受傷小頭人等各土兵七十四名隨酌賞阿旺及頭人等緞布銀牌而去臣仍令知府盛英即回周叟鼓勵土司以圖再舉

同日豐昇額五岱奏言臣等前奉

諭旨酌量分兵前赴谷噶丫口分防嗣經阿桂知會此時尚不能移動且彼處已派有鎮將節節嚴防實不慮賊人覬覦是以臣等尚不敢輕易移兵查凱立業實係賊酋要隘惟因番地春時多雪以致進

攻稍稽現定於達爾扎克東北溝內發兵繞取凱
立葉極頂山峯屢令索倫兵丁潛往跣看據此路
雪深石大難以竟進近日天氣晴朗冰雪漸消早
晚當於此溝進取均奏入

上諭軍機大臣曰阿桂奏稱羅博瓦已經攻克距遜克
爾宗不遠原可直下衝壓而羅博瓦對面山梁即係
喇穆喇穆現擬發兵截斷等語覽之深為欣慰豐昇
額等亦奏近日天氣晴朗冰雪漸消擬從達爾扎克

東北溝內早晚覓路進攻等語覽之深為欣慰而明亮等前日奏到擬用皮船過河攻取馬爾邦亦能兼用活法以資勝算看來逆酋罪惡貫盈其滅亡自可立待至金川番衆素稱兇狡前未經懲刈以致毫無忌憚今大兵所至殲戮甚多賊番自必心生畏懼朕意以為正當就其驚怯之時各路遍為宣諭以爾金川地方久隸中國版籍安享太平因爾逆酋索諾木莎羅奔兄弟及其大頭人等負恩反噬抗拒天朝實

為覆載所不容是以聲罪致討必須掃穴擒渠立時
誅磔以申國憲原於爾番衆無涉况逆酋平日恃其
兇惡蠶食鄰國方其攻奪之時番衆等為之捨死出
力輕蹈危亡及既佔得地方則逆酋獨專其利絲毫
不以分人爾番衆始終不知悔悟已屬至愚乃竟敢
與王師相抗尤為愍不畏死今選用八旗勁旅分路
兵所向殲戮無遺此皆爾等所目擊之者奈何不知
順逆甘心為賊受死乎本將軍仰體大皇帝如天好

生之心不忍盡行洗蕩特為明白宣諭爾等各宜猛省如能曉然於禍福利害之機即速設法將索諾木並其兄莎羅奔等其姑阿青及用事頭人丹巴沃禡爾等一併擒獻軍門不但可免爾等之罪並當奏聞大皇帝予以恩賞或併加之錄用若僅詣軍營投降亦當貸以不死仍令安居樂業共為良民豈不甚善設或迷而不悟則大兵所至有殺無赦若至彼時始行哀求悔無及矣各宜及早醒悟毋自貽戚如此廣

為傳播衆番聞之自必各自謀生正當軍聲極盛之時有此檄示相助獲效必速至阿桂今日奏到進勦兵丁內間有傷亡者著即查明咨部辦理又據舒常奏綽斯甲布土舍阿旺帶兵密進隨於柔染爾地方攻奪碉卡生擒賊番二名殺死金川頭人一名仍照例予賞所辦俱是宜喜一帶此時雖難即進但似此隨時殲賊奪碉亦足褫賊人之魄該處現尚未知阿桂捷音若阿桂乘勝深入賊必移兵至勒烏圍一帶

拒守則宜喜日傍之地自更空虛若即乘其不備密速進攻可期事半功倍將此令舒常留心妥辦

臣等按大軍攻克羅博瓦已扼賊酋門戶其於對面山梁即喇穆喇穆後路從此直壓遜克爾宗憑仗

天威勢同破竹廼蒙

皇上如天好生於迅雷奮掃之餘令臣阿桂等諭衆番明示以順逆禍福解網之仁與攻瑕之用並行

不悖至宜喜一路前進較難屢奉

訓諭以西路乘勝深入賊移兵拒守則此處自易於攻
取逮後未及一年西路連克色溯普康薩爾明
亮即進據宜喜山梁並攻得俄坡日傍等處與
西路兵會合克敵情形瞭如指掌已無一不在
睿照中矣

上諭內閣曰羅博瓦為賊酋緊要近捷門戶屢經阿桂
等相機進剿今復將其山峯全行佔住殲賊甚多皆

由阿桂調度有方將領等奮勇直前海蘭察普爾普額森特等尤為出衆故能所向克捷實屬可嘉阿桂著晉階太子太保海蘭察著授為內大臣普爾普額森特著授為散秩大臣以示獎勵至其餘出力將弁及滿漢屯土官兵俱著查明登記冊檔俟攻克勒烏圍後一併優叙

上又諭內閣曰此次攻取羅博瓦山梁賊人向下來衝達蘭泰等痛戮賊衆佔據山峯實屬可嘉協領依蘭

保著賞給扎濟克巴圖魯名號委署營長八十三著
賞給他爾濟特巴圖魯名號仍照例各賞給銀一百
兩委叅領博純著賞戴花翎藍翎侍衛一綽爾齊喀
達蘭泰均著授為三等侍衛達蘭泰既有巴圖魯名
號仍著賞銀一百兩以示獎勵

乙丑阿桂色布騰巴爾珠爾奏言

臣

等查羅博瓦

各峯業經官兵攻得則進攻遜克爾宗格魯魯瓦覺
皆係居高臨下原為得勢惟第四峯下突起一岡

而是岡迤邐而下又分三股中間林箐深黑其傍亦係陡崖是日官兵因深入賊境將各緊要地方分頭築卡於二十五遙見見林箐中有煙火且望見賊番搬運木石臣等派兵於二十六日黎明進攻林中有大小木城四座石碉二座其外又衛以石卡海蘭察額森特烏什哈達等帶兵分為兩翼圍進遇賊三百餘人突出拒敵我兵乘勢衝壓連搶石卡三座併分兩翼圍困木城賊復聚集多人

潛匿林中欲截我兵之後滿洲索倫官兵回身奮
擊亦多殲殪但此四木城兩礮內放鎗皆可相及
我兵未免受傷且因天暮暫撤此次功勦共殲賊
八九十名並殺頭人二名據小金川番人稱一名
阿布波烈係得斯東寨頭人一名格楞布係勒馬
圍喇嘛頭人為莎羅奔岡達克所最任用者至我
官兵內惟藍翎侍衛綽爾齊喀陣亡臣等察看木
城石礮宜用大礮轟推撲取始易為力且此處尚

可繞進之路現在相機辦理以期迅速深入以奏
入報

聞

同日阿桂色布騰巴爾珠爾又奏言查丹壩土舍
臣曾令總兵五福實力駕馭茲據五福稟稱二月
十七日同副將李天佑前赴丹壩官寨挑派頭人
土兵一百二十名即於是夜潛往穆爾津岡右面
塔爾沁地方燒燬賊寨二座殺賊一并擒獲七名

口此內婦女六口給賞該土舍以示鼓勵其生擒
之德爾日嘉解至大營臣等親加訊聞據伊稱在
穆爾津岡聽見金川人說凱立葉山梁是要緊地
方派色爾里達扎木各寨人把守領兵頭人是達
什阿庫魯山塔爾薩木坦二人至谷噶路徑從前
未經走過聽見山勢窄隘小路叢雜現派有格魯
瓦覺及達色爾木波等寨人踞守因賊人被官兵
殲戮甚多連班第喇嘛俱遣出來打仗領兵的是

勒烏圍頭人等實策旺格魯瓦覺頭人桑結塔爾
等語除將該番正法外臣等復札囑五福留心察
訪賊人無備之處即撥土兵前往剿殺以分賊勢
奏入報

聞

同日

上諭軍機大臣曰阿桂等奏訊據賊兵番德爾日嘉供
內有賊被我兵殲戮甚多將喇嘛班第遣出打仗等

語此即賊人滅亡之兆從前準噶爾額魯特等被大
兵窮蹙將喇嘛班第等俱行遣出打仗是以旋即殄
滅今逆苗索諾木因大兵深入不能抵禦始將喇嘛
班第等遣出由此看來賊酋斷難久延大功計日可
就朕當佇聽喜音

同日

上諭內閣曰阿桂等奏從前所出未經補放之委署前
鋒叅領前鋒校員缺請將奮勉出力人員揀補著照

所請健銳營委署前鋒叅領烏雲布員缺即著本營
前鋒校色赫納補授其烏爾圖員缺著火器營烏鎗
護軍校七十五補授火器營委署烏鎗護軍叅領員
缺著本營烏鎗護軍校德海補授其色赫納所遺之
缺著藍翎永保補授七十五所遺之缺著烏鎗領長
巴爾布補授德海所遺之缺著額魯特護軍德布星
額補授再已陞委署護軍叅領長存所遺之護軍校
員缺將額魯特護軍巴圖補授

平定兩金川方畧卷九十一

欽定四庫全書

史部

平定兩金川方略卷九十二至
四

員外郎_臣顧宗泰覆勘

總校官原任侍講_臣王燕緒

欽定四庫全書

平定兩金川方略卷九十二

三月丙寅明亮富德奏言

臣

查穆當噶爾賊碉連

日用砲轟摧殘毀已及十分之七賊番見勢危迫

於二十六日亦擡一砲潛匿山洞希圖迎擊隔河

築牆當將二將軍砲位對準洞口施放令砲子直

入洞內燬透賊番火藥應聲迸裂將賊殲斃無遺

至河北喀咱普山腿上賊碉攻之自不可緩

臣等

現移各種砲位對準施放一經殘破督兵攻撲務期得手此兩日內自金川河上流漂出賊番男婦屍身十餘不知何故或係小金川番人不安於內而前此投番穆塔爾等復赴前敵招降賊番自相猜忌即將小金川人之有異心者陸續棄之河內均未可定如果屬實則小金川各番必成內潰於進勦未嘗無補

同日明亮富德又奏言查德爾格忒境內大喇嘛

斯都胡土克圖先經遣人稟稱聞大兵攻勦金川
為衆土司除害現今前藏後藏喇嘛俱各諷經祈
佑我願親自來營虔誦得勝經以展誠心等語臣
等查西南各路土司於斯都胡土克圖最稱信服
為向來求見而不可得者今既願來營以堅各番
助順之心未始無益但聞其年近七旬或艱跋涉
因派通事前往令其自為酌量茲據斯都胡土克
圖約同拜玉寺大喇嘛干瑪扎什等已於正月十

二日起程現在南路各番民聞知該喇嘛等俱肯
來營念經必係金川當即日滅亡其踴躍奮興之
意更倍往時借以鼓勵伊等出力打仗自易見功
臣等已令沿途站員量為照應俟抵軍營經事已
畢視其精力何如再令其赴西路均奏入

上諭軍機大臣曰明亮奏斯都胡土克圖情願來營諷
經等語此亦甚好且俟其到營後如何出力再行奏
聞酌加恩賞其西路軍營應否令其前往著阿桂等

速為酌定通知明亮照料此事應令各路軍營土兵等廣為傳播使金川賊衆隱懷疑懼更足懈其守禦之心是亦隨宜用計之一法又據奏賊番藏砲山洞我兵即將砲位對洞施放將賊火藥燃烘賊皆殲斃等語即此可見金川速滅之兆明亮等亦當祭山祭砲以答神助又據奏此兩日內自金川上流淌出賊番男婦屍身十餘或係小金川番人不安於內賊中自相猜忌棄之河流等語亦屬或有之事且近日聞

僧格桑為索諾木所拘必更多怨望其衆心離散可知前曾諭令各路將軍曉諭金川諸番有能及早投順者即予免罪如能擒獻逆首兄弟及大頭人者並加恩賞番衆聞之其心必漸動搖加以各路上緊攻打賊必至於內潰似亦理所必然將軍等均當努力為之

戊辰豐昇額五岱奏言臣等前議欲從達爾扎克之北下至凱立葉山根佔據山峯俟天霽雪消竭

力辦理今二十八九兩日天氣少晴雪亦漸融臣
等即派官兵於三十日夜半時發兵由山澗內越
石踏雪而進黎明俱到凱立葉山根當乘天色未
明即派侍衛那木扎等過嶺直入見有大小山峯
六處各有大碉賊見我兵臨近鎗石齊發臣等督
令官兵直前衝擊並令侍衛彰霽明仁繞取第二
峯侍衛瑪爾占伊達里第奪取第三峯以分賊勢
其第一山峯之賊出卡攔截我兵鎗箭齊施斃賊

數名其第二第三峯賊衆亦盡皆出碉拒戰各隊官兵奮勇擊殺約殲三十餘名餘皆驚遁遂盡克三峯碉卡仍往撲第四山峯賊皆匿不敢出憑高死守會已日暮暫將兵丁撤回臣五岱即於山峯之下立營駐守臣等將已得山峯周回詳勘賊番現據之第四山峯即係凱立葉之山頂過此山峯即可俯壓是以捨死據守正在商議攻取間准阿桂差通事賡噶與梭磨人拉木占前來據稱羅博

瓦礫卡已全攻取現在山頂下營遙望凱立葉山
特差我等來看南山之路如可行走彼此派兵夾
攻使兩路可通等語臣等即將新得之處令其詳
看仍令查勘南山道路俟看明回報阿桂如何辦
理臣等自當一體遵辦奏入

上諭軍機大臣曰豐昇額奏凱立葉三峯已將賊卡悉
行奪取又准阿桂知會差遣通事賡噶等偵看南山
道路彼此夾攻等語所辦甚好兩軍會合則兵力益

增不日成功佇聽捷音再賡噶係從前被擒脫出投
赴阿桂之人今差赴豐昇額軍營想因詳知路徑尚
可信用始行差遣如其平時出力理應酌量加恩以
示鼓勵從前平定準噶爾時額魯特內誠心出力者
俱為加恩遂深得伊等之力至今差遣無不輸誠今
惟欲殲滅兩金川賊衆與其餘土司無涉伊等內如
有出力者酌加恩賚不惟現在得力即此後凡有差
遣亦當共効誠心著阿桂等查明賡噶自投來之後

如何出力應如何施恩之處酌擬具奏

辛未阿桂色布騰巴爾珠爾奏言查得羅博瓦迤下山岡之北有得斯東寨一處係賊番住居之地人戶不多從高下壓既可無用多兵而燒燬其寨殲戮其人亦足令賊番喪膽因於初四日令海蘭察額森特福康安海祿等帶兵分為兩隊前往剿殺比至寨前賊番上前迎拒而寨內之賊亦放鎗助勢官兵鎗箭齊發殺賊十餘人其餘奔竄額森

特等督兵斫破寨門縱火焚燒賊人出寨奔逃我
兵追殺又斃十餘人但此寨附近凱立葉若令官
兵留住賊必疑我有會攻凱立葉之局預先設備
轉有未便因令官兵緩緩撤回臣等於數日內將
所有要隘卡柵趕修完竣即可抽撤官兵迅速妥
辦

同日阿桂色布騰巴爾珠爾又奏言三月初三日
有小金川番人科爾甲斯丹巴二名從賊境投出

來營臣即親訊據稱聞得谷噶一路官兵甚為利

害前日格魯瓦覺一仗頭人被鎗箭死者共有六

七人又有金川大頭人達實策旺頭上中箭擡回

不知死活金川人都說官兵把羅博瓦全奪去了

弓箭甚是利害現派各頭人在各緊要地方把守

惟有丹巴沃雜爾山塔爾薩木坦兩人來往巡查

與索諾木莎羅奔岡達克商量事情等語查該番

所供情節與臣等節次訪詢無異而伊等妻子現

在安插雜谷腦核其名字年歲亦屬相同似無可疑近奉

上諭賊人屢次喊稟應照前此語意傳諭賊番使之離

心臣等當將前此飭示大意詳悉告教並賞給科

爾甲等衣帽派兵弁送至前敵高聲叫喊賊番聞

之均各俯首無詞似有心動之意因令科爾甲等

暫回雜谷腦看視家屬後再來軍營以供差遣奏

入

上諭軍機大臣曰阿桂等奏焚勦得斯東寨情形一摺
所辦甚好佇盼捷音又奏番人科爾甲等供稱官兵
此次攻勦金川賊番都極害怕等語官兵連次得勝
聲勢倍加壯盛乘其聞風膽怯之時相機深入自可
即望成功至頭人內丹巴沃雜爾尤為可惡若能及
早殲除則金川失一得力之人我兵奮攻自更易為
力阿桂等務努力為之發去鏤玉題崖韞一枚朕親
製詩命工鐫成寄賞阿桂為指顧銘勲吉語將此加

緊傳諭知之

同日文綬奏言查川省辦理軍儲撥派民夫挽運
每站多至千餘以及六七百名不等原照乾隆十
二三年金川舊例三月換班一次嗣蒙

聖諭以小民道遠趨事僕僕為勞飭令妥議經臣酌議
奏請改為閱五月換班一次蓋站夫久役思歸情
所不免惟定有期限始能安心待替時至五月不
為不久各夫得替散歸自謀生理迨後人夫應換

之時該地方又隨時起夫上站其中即有前次人
夫受雇再往者亦出於本人情願總惟事有定規
又從民便但各站遠近不一而小民惟利是趨現
在各站民夫俱係新近換班而大兵所向克捷成
功在即必不至於久役應通飭各站員預為曉示
如有情願於五個月之外留站供役者即報知原
籍地方官將其應得雇價先期辦解給領仍留原
站可省雇覓往返之煩至口外有可添雇蠻人男

婦之處臣業飭各路司道就該處情形查辦如能
常常供役亦可省內地雇夫之費俟該司道等覆
到時再行酌辦奏入報

聞

同日富勒渾奏言臣因將軍阿桂攻克羅博瓦進
攻格魯瓦覺乘勝即可直搗賊巢一切預備軍儲
並後路防守各兵如何歸併派撥當與阿桂面商
據稱現在軍報軍糧由楸砮一路行走情形與前

迴異其大板昭一帶為西北兩軍扼要後路此時
更宜嚴加防守等語查預備移師進剿加站添臺
等事臣與郝碩俱已料理停妥軍糧軍火砲料等
項亦皆運備充餘茲奉

諭旨令將應運楸砥之米上緊催趲滾運臣隨馳回大

板昭一帶督辦北路軍糧並稽查沿途卡隘據報
楸砥一路每站各已安夫五七百名不等每日運
米可得二三百石所有成都潼川兩府屬承辦大

板昭長運之米各一萬石俱將抵站臣查此路軍糧最關緊要必須加緊趕運以期暢行隨飭新開各站上緊催輓復派知府等實力稽查督率防範以資彈壓至西路文報早由楸砥馳遞後路撤裁之馬業已陸續解到逐站加增復據省局辦解馬一百匹俟解到再行酌添各站更覺充餘臣於查辦卡隘後即回大板昭嚴防後路督運軍糈俟將軍阿桂一有移營前進之信臣即馳赴軍營會同

郝碩將臺站事宜一律安設妥協奏入報

聞

士申明亮富德奏言臣等查穆當噶爾硯卡現已
摧殘賊勢漸為窮蹙惟喀咱普一硯雖經佔取用
砲逼近施放而賊番死守尚難乘船徑渡至所探
駱駝溝一處據探路人回稱山陰積雪尚深難以
跣道然際此風日晴和正宜及時進取查奎林所
佔山梁前因頂上積雪已消即統兵下壓因係無

水地方是以將官兵暫撤止留一千三百名在山
拒守初二日亥刻約有賊番二百餘人突來搶奪
第三第四兩座營盤捨死相撲官兵據守深溝放
鎗擊打而前後各營排鎗齊下賊番受傷甚多分
頭奔竄初三日據巴旺土兵礮本自賊中脫出稟
稱被賊縛去見番衆敗回之後查點傷斃多人並
有頭人受傷身死即於是夜乘空走回等語當經
土兵沿途尋看賊踪直下箐林中間於斯第之上

地名班得古流出暗泉一道涓涓不絕具報前來臣等
思斯第博堵若能進克於賊番所恃兩岸險要已不啻
拊其背而扼其吭即庚額特一帶山梁雖能拒守而向
東一面地勢稍寬即可乘船過渡且既覓有暗泉即兵
丁執爨有資况我兵自撤下山賊番已經知覺此一路
若防守稍疎更可攻其無備臣等簡閱兵丁公同商酌
河北庚額特山後了口一路派扎爾桑等領兵一千五
百名相機上攻山前穆當噶爾一路派舒景安等領兵

五百名繞出土兵所築五碕之前逐步進逼再派舒亮帶兵五百名在正西一面揚威牽綴使之不能他顧臣

富德即同奎林三寶和隆武及侍衛將領等帶兵六千名各裹七日口糧於初八日進發先佔水泉亟取斯第定於十一日黎明各路同時努力並進臣明亮帶兵千名

赴喀咱普一路分為兩隊一從迎面進攻一從繞不壓取遙為斯第一路官兵聲勢使賊人兩面受敵應接不暇仍將船隻預備齊全臨時如可渡往河北亦即添兵並進總

期斯第一處得手則各路軍心並壯而博堵亦可
迎刃而解奏入

上諭軍機大臣曰明亮等奏酌定進攻道路剋日發兵
一摺布置甚合機宜惟在將領弁兵等努力前進迅
奏膚功以膺茂賞

同日常青奏言

臣 欽奉

上諭令駐守布朗郭宗等處
臣 即將布朗郭宗事務移
交副都統富興暫管於二十九日起程前往美諾

僧格宗一帶核查卡倫至納木覺爾宗地方見叅將汪騰龍據稱南路各處安駐官兵卡隘已悉照將軍明亮所指布置謹嚴臣又於經過之科多默

資溝二道山梁僧格宗納木覺爾宗等處留心查看每處各安兵一百名卡隘堅固地勢均屬得宜而防兵亦皆壯健臣於初二日仍回美諾與王進泰成果等由河南一帶各卡隘處所復加相度由薩穆果穆橋過河上坡勘得翁固達山梁一道直

抵巴木通其山極為高峻山左即功噶爾拉崇德
一帶密箐深溝徑通美諾山北即係破碉帛噶爾
角克碉喇嘛寺一帶俱係要隘之處每卡安兵一
百名查翁固達距喇布寨約十餘里而喇布寨距
格斯底實止三四里應於三處每卡派兵十名於
居中山頂新設小卡安駐連絡聲勢臣查巴木達
沙木拉爾資二處原駐兵一百五十名因彼處附
近鄂克什可以毋庸多設今酌留漢兵四十名土

兵六十名在彼防守抽出漢兵一百十名併於美諾兵內撥出九十名合為二百派員帶領駐劄新設之處並總管翁固達格斯底喇布寨三卡官兵俾聲勢壯盛益徵穩固又與王進泰面議嗣後凡分駐卡隘兵內每處分兵百名派作兩班日夜更番防守始為嚴密臣等將此一帶布置傳妥隨回布朗郭宗因現在楸砥餉道初開瑪爾當大板昭各卡實為西北兩軍喫緊總滙後路現在將軍阿

桂屢經克捷大兵愈進愈遠後路更須加緊防範
隨由布朗郭宗查至大板昭嚴飭將弁巡防務期
嚴密奏入報

聞

乙亥豐昇額五岱奏言

臣

等前將凱立葉三山峯

攻取卡座正在籌辦間先經阿桂處差令番人賡
嚙前來探路本月初五日又遣領隊大臣海蘭察
來看如何夾擊

臣

等即同海蘭察週圍查看仍令

其回谷噶軍營并繪圖送往阿桂閱看茲准將軍
阿桂云我此處與經練之領隊大臣熟計若兩路
同日並進彼此隔遠難以通信少有參差反為無
益今谷噶可攻之處甚多副將軍豐昇額可帶兵
四五千名來至谷噶合力攻取尤可速抵賊巢等
語臣等思阿桂既云谷噶多可攻之處令臣豐昇
額赴彼同辦兩營相隔亦不甚遠臣豐昇額即將
應帶應存之兵統俟與阿桂面定後再將辦理情

形具奏奏入

上諭軍機大臣曰豐昇額奏阿桂稱谷噶一路可乘之
隙甚多令帶兵前往併力辦理等語凱立葉一路既
難進原不應過於株守今留五岱在凱立葉牽綴
賊勢而豐昇額前赴阿桂軍營合力進攻兵勢更盛
於事更為有益若果進至勒烏圍則凱立葉之賊自
可不攻而潰至於兩營相距不遠往來本屬甚便但
所經路徑賊人皆可瞭望而知如前此海蘭察等行

走所帶之人無多或尚不甚覺此次撥兵至四五千名即難掩賊番之耳目萬一窺見我兵移動潛來邀截皆不可不極力嚴防著傳諭五岱於撥兵前往時務須妥為照料勿使賊人得以伺我兵之隙方為妥善

臣等謹按行軍要領在審地勢尤貴合兵力凱立葉一路當進兵谷噶時先蒙疊降

諭旨以凱立葉難于遙進不若移赴西路為助勦聲援

臣
阿桂等審度形勢見谷噶可乘之隙甚多即
遵

旨請留五岱帶兵牽掣而令豐昇額移兵谷噶軍營夾
擊自此勢力合併軍聲益壯凱立葉山梁不久
攻克其初牽綴賊勢繼且不攻自潰

睿畧豫定所由計出萬全也

同日鄂寶富勒渾文綬奏言臣等查北路長運之
米止能運至周叟自周叟以至宜喜核計長運脚

價加以滾運夫工口糧每石共需二十三兩較由南路運至木池原定二十五兩七錢八分之價每石約省銀二兩有餘去歲以綽斯甲布餉道初開輓運維艱專恃北路不敷儲備是以兼辦南路長運木池之米協供宜喜迨宜喜糧儲充裕即將木池長運停止今年又因北路趕辦楸砥新開糧運未能兼供宜喜復撥打箭爐百石運往木池近來楸砥糧米漸見疏通除運供凱立葉軍營尚有盈

餘臣鄂寶現飭總理各員逐站滾運宜喜以期接濟其打箭爐長運木池之米現飭暫停惟是糧運情形一時盈絀不同儻嗣後或有不得不由南路並運協濟之處再當隨時籌畫妥酌辦理奏入報

聞

平定兩金川方略卷九十二

欽定四庫全書

平定兩金川方略卷九十三

三月丙子阿桂色布騰巴爾珠爾奏言

臣

等查羅

博瓦山峯一帶業已攻開官兵隨在可以相機直

搗且距勒烏圍日近賊勢日形窘迫衛死護巢自

必前來死鬪但賊人深知官兵精銳異常而弓箭

尤為所畏斷不敢明來接仗必於夜間侵擾

臣

等

先已嚴飭各卡倫倍加防範三月初七日亥刻雪

霧迷漫之際有賊八九百人分為四股一股從羅博瓦山陽潛上兩股從羅博瓦山陰潛上合搶山峯中間副將常祿保營盤又有一股直攻登古後山維時賊人將常祿保營盤四面圍攻勢甚洶湧常祿保督率官兵放鎗拋石奮力擊打并將跳入卡內之賊立時砍斃其時烏什哈達額森特福康安聞有鎗聲先後帶兵接應而常祿保所帶陝甘官兵一見援兵來至勇氣倍增內外夾擊賊人慌

亂敗逃其侵擾登古山梁賊衆亦已潛至湖廣官
兵石卡拚死衝撲官兵正在相持普爾普聞信亦
帶滿漢各兵分為兩翼衝殺賊番勢不能支下溝
敗遁維時烏什哈達等正欲接應登古山梁見各
路賊番順溝逃遁遂同巴圖魯侍衛額爾特等帶
兵從山坡斜下截斷賊人歸路鎗箭齊發往來衝
殺直至次日卯刻賊人除殺死之外帶有鎗箭傷
者甚衆俱滾山穿箐而逃至初八日夜間雪霧更

大又有賊百餘潛來叅領索柱副將楊崑營壘官兵瞭見放鎗追擊賊番亦即敗回查賊因大兵即日搗巢瀕死心迫不但于各寨內極力攢湊凡可打仗之人及番僧等悉行派出並於宜喜日旁抽撥四寨之人且係莎羅奔弟兄等三人與伊大頭人等親自率領前來實已盡其力量抵死一戰希冀搶奪羅博瓦山峯及登古了山即可截斷官兵彼此不能接應是以并攜帶口糧以為據守之計

不料我兵防範嚴密賊既無從奪據轉使官兵截其歸路得以痛加殲戮并斃其大頭人嘉木阿中雍中朋實為天奪其魄所以初八日夜賊雖料我兵得勝之後不復設備或尚可以乘隙得志而所來賊衆止有百餘一經官兵知覺相率潰逃則其心胆俱寒已可概見若再得一二勝仗并復痛加殲戮則賊番震懼既深勢必漸行潰敗奏入

上諭內閣曰此次賊衆潛來偷劫營盤經官兵奮勇合

擊痛加勦戮甚屬可嘉常祿保功績尤為出眾著賞
給錫諾爾恩巴圖魯名號仍照例賞銀一百兩並著
以總兵陞用遇有缺出即行補授

上諭軍機大臣曰阿桂等奏痛殲偷劫官兵營卡賊眾
情形一摺所辦甚好此次常祿保功績甚為出眾已
有旨賞給巴圖魯名號並令以總兵陞用以示鼓勵
其在常祿保軍營出力兵丁亦著查賞又另有賊眾
侵登古山梁營卡官兵亦奮力相持經普爾普帶兵

往援將賊衝擊殲勦是登古帶兵之員亦尚為出力
並著阿桂查明如有應獎賞之處奏聞請旨其烏什
哈達額森特福康安普爾普聞有鎗聲即各帶兵前
往接應亦屬可嘉並著阿桂存記俟攻克時一併開
列事蹟交該部優敘看來現在賊勢日益窘迫其自
衛必更著急而其狡詭之處亦甚為可恨恐似此潛
出劫營之事皆所常有而官兵漸次深入賊計亦必
以漸而增尤不可不實力防禦各路將軍當傳諭守

卡各員均須加意嚴守務以常祿保為法以冀仰承
恩眷至王進泰年齒漸老且未經歷軍務在美諾不
能得力已將伊調補廣西提督派令旺保祿馳驛前
往署理四川提督事務矣

同日阿桂奏言臣查此次大兵進勦業已催開要
隘前距賊巢甚近賊人雖節節死守勢必即可殄
滅若再得生力兵二三千另為一路伺隙搗虛更
可迅速集事查吉林索倫兵丁驍健出衆惟計算

程途太遠即京兵前來亦需時日且車馬費用較多臣仰荷

聖明垂詢悉心斟酌竊思雲貴兩省距川既近而兵丁亦為得用若將前此該督撫奏明預備之五千特降

諭旨令其來川程途既為捷近若一有竣事之局停止亦易奏入

上諭軍機大臣曰前以阿桂等分勦金川俱能乘勝深

入或分路進攻更易集事因將應否添用京兵之處
令阿桂熟籌密奏今阿桂奏稱京兵到營稍需時日
因思雲貴二省距川較近且昨歲該督撫等曾預備
兵五千應請旨調令赴川應用所籌亦是著傳諭李
湖圖思德即將上年預備調川省兵丁內揀選雲南
兵三千名貴州兵二千名並選派勇幹習練將領等
帶兵星速肅行所有軍火器械一併攜帶毋稍濡滯
同日阿桂色布騰巴爾珠爾奏言查豐昇額一路

官兵現雖由達爾扎克山溝攻佔凱立葉山峯三十而賊番尚於第四高峯緊守未能即時攻克臣等原擬從凱立葉山腿日爾巴當噶地方斜上接通豐昇額之兵惟是此一帶詳悉形勢臣等未經親歷因節遣番人賡噶等探看道路復令都統海蘭察親往相度據海蘭察等回稱以日爾巴當噶碉卡如有多兵彼此夾攻未嘗不可搶佔但豐昇額處除分防外只能抽出兵三千人而此間羅博

瓦一帶分駐官兵亦僅能抽撤二三千且該處箐林深密崖砌陡險兼之彼此隔遠雪霧時作萬一不能如約一處稍稽即不免一處失挫自遵照近奉

諭旨令豐昇額將凱立葉緊要處所令五岱帶兵牽綴而親自帶兵數千前來或先攻日爾巴當噶碉卡或截喇穆喇穆後路分兵攻取格魯瓦覺遜克爾宗等處均無不可辦理俟與豐昇額會見籌定進

攻之處另行具奏奏入報

聞

同日

上諭內閣曰現在將軍阿桂等分路進攻佇見擒渠埽穴所有領隊之人愈多於事更為有益着派乾清門三等侍衛富寧治儀正格勒爾德藍翎侍衛泰斐英阿親軍十五善射阿蘭保馳驛前往四川軍營交將軍阿桂於軍營領隊大臣侍衛內將年邁不能得力

者更換回京即將伊等令其領隊行走着交該部將
伊等應得之項即行給與外仍照乾清門侍衛之例
每人賞銀一百兩

上又諭內閣曰現在勦洗賊人成功伊邇所有預備之
健銳火器兩營兵丁均着毋庸派往至積福業已年
邁音濟圖自抵軍營年久不甚得力着令回京副都
統署護軍統領都爾甲署提督旺保祿令其馳驛前
往軍營領隊

上又諭內閣曰現在三路將軍深入賊境指日蕞功出力官兵所在需翎獎賞計從前發往三路翎枝將次用完着三路各賞孔雀翎十枝藍翎二十枝交與阿桂豐昇額明亮等以備賞給官兵戴用

己卯舒常奏言三月十二日探得箐林內隱有賊番烟火潛為聚集臣隨於是日分派官兵設伏十三日黎明馬彪等領兵三百餘名向上進攻遇賊百餘分為兩路下壓官兵鎗箭齊施奮力接仗其

西面了口內復有八九十賊欲截後路烏爾圖納遜等領兵二百名由水卡向西迎敵鎗箭並發至

臣見達爾圖大碉之東賊人聚集喊叫即派一百餘兵令叅領全保等帶往迎敵此處賊番望見兩路賊人俱被官兵擊敗奔竄大碉旋即敗走三路官兵合力乘勝追至箐林極密之處始行撤出奏入報

聞

同日常青富興奏言三月十一日已刻據副將握
星泰稟稱喇嘛寺地方於初十日亥刻突有賊匪
四十五人分作三股從後山梁衝下以兩股徑撲
卡倫一股向買賣街搶掠客貨當經護軍校舒隆
阿督兵抵禦復上哨樓射賊對面駐守糧臺弁兵
舉鎗接應賊即逃遁其搶劫貨物之賊亦被客民
站夫等各執刀矛抵鬪隨亦逃去等語臣查後路
分駐各處隘卡地方久經嚴飭將弁逐日派兵會

哨搜山將及三月實為寧靜今於初十日夜忽有賊番四五十人赴喇嘛寺地方驚擾卡隘糧臺是提臣王進泰拏獲賊番穆泰所供賊目順納擁中商帶賊六十名來放夾壩之語屬實自應設法併力遍處搜勦以靖後路臣等詳加籌畫布朗郭宗一帶地方緊接將軍阿桂後路更有大板昭瑪爾當二處現係新開楸砮餉道屯積軍糧之所而美臥溝尤係金川要道實在不便抽派兵丁遠涉搜

勦已分飭該將弁等各於附近山麓溝壑林木叢
深處所舉火沿燒實力搜捕仍於布朗郭宗木波
等處挑派弁兵三百名由登春一帶附近簇拉角
克等處沿燒搜勦並將日期札知王進泰在翁固
達山梁官兵內酌派一二百名於所過山溝直至
崇德後山又於美諾酌派官兵一二百經由乾海
子溝內直抵大壩溝俱同日遍行搜捕務使賊無
棲止之處嗣後各處統以間二日如前查辦一次

至於各處營卡仍逐日酌派弁兵於附近地方實心併力會哨搜山則賊匪難以潛藏後路可期寧謐矣奏入

上諭軍機大臣曰常青奏查辦夾壩一摺自應如此籌辦但因王進泰處拏獲賊番穆泰訊供有聞得金川頭人順納擁中帶同賊衆前往簇拉角克等處偷放夾壩之語遂以此等夾壩為確係金川之賊似未必然金川賊人如果出而滋事豈肯僅為搶掠之理聞

小金川賊番逃附金川者並無養贍俱令自覓口食此等番人在彼餬口無資亦并無可攫取勢不得不出而搶劫金川賊酋聽其外出既省該處坐食之繁且縱之以助滋擾之勢人見其從金川隘口而來遂指為金川之賊又兼綠旂怯懦弁兵糧臺無能夫役一見有賊輒自驚疑其實不過烏合窮番希圖謀食並非金川之賊別有詭謀也惟是賊匪所放夾壩之處皆係我兵後路均關緊要今常青遇有箐林可以

藏賊者即派兵焚燒搜勦綠營兵他事無用至於故
火焚林尚屬力所能為果能辦理無間於事自為有
益布朗郭宗等處有常青來往照料可以無慮而大
板昭一帶尤為阿桂軍營切要後路更不可不加意
防範第該處距布朗郭宗稍遠常青難於兼顧富勒
渾在梭洛柏古一帶距大板昭約計二三十里著富
勒渾選派明幹之員帶兵數百名往來搜查遇有應
勦者即行勦洗應焚者即行焚燒以期於事有濟

庚辰明亮富德奏言本月初八日發兵下壓斯第
並令各路官兵同時並進臣明亮於十一日黎明
從喀咱普前向西進攻又派侍衛阿爾都繞山壓
取而賊碉內鎗石並發兼以庚額特一帶隔河鎗
礮驟至其沿山一面復被滾石攔阻左右受敵必
俟斯第得有下壓之信方可前進隨即列兵以待
臣富德上至山頂察看形勢環山上下數十里間
樹林深黑懸崖陡礮跬步為難而兩旁山徑叢雜

酌量緊要留兵駐守隨令奎林等帶兵四百五十名同守備張芝元帶土兵五百名作為第一隊先行下壓和隆武等帶兵四百五十名作為二隊三寶等帶兵四百五十名作為三隊接續前進先搶班得古水泉但其上即有賊番來路預派侍衛利保住帶兵五百名前往牽綴其自水泉以至山頂派叅領阿爾薩朗一路安兵七百名聯絡送水臣富德尚餘兵六百名為後路策應奎林察看班得

古水泉北下二十餘里其水折而東流相去隔遠
另有水卡在東面思覺山腿之旁亦有賊碉守護
因復北下五六里其通平寨之處復有大戰碉一
座護守山梁奎林隨即督兵將平寨奪取燒燬賊
俱竄入大碉守禦其勢必須三面圍攻是時和隆
武所帶兩隊兵丁亦已相次而下詎西面山岡兩
座賊碉之內突來數十餘人從旁截出將三寶所
帶第三隊官兵牽綴打仗和隆武亦被東面卡碉

內各賊出而迎拒我兵上前擊退正在立柵自固而思覺續到之賊轉出和隆之上將三寶繼進兵丁從中隔斷於時臣富德望見河北馬爾邦一路賊舡往來如織而河南克舟九寨救援賊人復又絡繹踵至情勢實為緊急當即分兵三百名交與科瑪協同三寶並力下壓一面親帶兵三百名繞至西山岡冀得乘虛襲碣兩座賊碣即可下引奎林和隆武兩路之兵及到碣下賊已先回拒守臣

富德抽班得古之兵五百名與三寶科瑪等屢次並力下壓而賊於隘口密用排鎗堵禦且和隆武隊內已被賊人攪作一處鏖戰雖殺賊甚多我兵亦有傷損兼以和隆武殺賊矢盡止用矛鎗格鬪遂至身受鎗傷兩處官兵奮力衝出始與奎林合為一處駐紮閱看山勢逼仄但聞賊番哨聲四集並無出路可尋臣明亮聞信即抽出官兵九百名派德赫布連夜馳往合攻西山岡兩座賊碉但賊

碉分據山嘴中通一線險絕異常且碉前復掘濠溝深廣皆有一丈我兵自十一日至十二日夜屢次踰溝相撲賊亦出碉抵禦被殺甚多究屬無隙可乘而三寶科瑪等更番帶兵抵冒鎗石終不能衝開賊人卡路往下救援當此萬分緊急適侍衛阿爾都帶兵喀咱普山側聞奎林受圍在內隨即帶兵五百餘名於至險至絕之地層層爬越前行得以連克賊卡兩處於十二日將晚與奎林一路

相通奎林先將和隆武送出以此次甚煩兵力未
便半途而廢惟囑送水數十簍以濟兵丁兩日受
渴即可仍留攻打詎賊於山梁左右復出斷路奎
林審度情形不能久住派令叅領登色保等在前
開路親與侍衛珠爾格德在後壓隊甫經移動而
賊番猝至聚攻奎林被賊飛石擊中脊背仍在抵
鬪復有兩賊舉刀搶至經珠爾格德在旁連發兩
矢應弦倒斃餘賊四散隨即一路追殺行至絕壁

之上必須側身貼石手足並用而其下箐林內賊人放鎗仰擊實難踰越時阿爾都於所佔賊卡間用鎗下擊攔截賊人使其不得近前因得以攀躋無阻於十三日戌刻拔出重圍十四日將兵漸次收回於山梁各營盤照舊留兵防守別為籌辦奏入

上諭軍機大臣曰明亮等奏進攻斯第打仗情形一摺將領官兵俱於至危至險之時仍能鼓勇殺賊甚屬

可嘉俱應查明存記檔案俟應行議敘時一併咨部
從優錄敘其將軍明亮叅贊富德董率勤勞奎林和
隆武力戰受傷更為繫念已賞給玉韞並有旨同阿
爾都珠爾格德分別賞給荷包以示慰勞矣前明亮
等以覓有水泉奏於十一日會兵進勦朕即疑脫出
番人硜本情節支離其言未必足信恐係賊番詭計
縱出引誘我兵墮其術中深以為慮連日盼明亮一
路軍報逾期不至屢以此向軍機大臣論及今閱所

奏攻戰情形果不出朕之所料幸而我八旂勁旅各
以敵愾為心帶兵之滿洲將佐皆實心體國志在勵
勇滅賊故能不避艱阻出險而亨至前此指引路徑
之番兵實為可恨不可不向其切實跟究雖係巴旺
番人未便遽加刑訊亦當密喚至營嚴加盤詰使之
不能遁飾如果訊得該番受金川指使實情即傳巴
旺頭人至前將該處正法示衆庶足警戒將來至明
亮等此次進攻雖亦奮勇殺賊然將弁兵丁受傷者

至百餘人究不免於少挫明亮此時且宜整兵少待而斯第一路尤不宜冒昧再往現在阿桂一路軍聲甚振且有可進之機豐昇額又前往會勦自可望其乘勢深入如阿桂等能攻至勒烏圍賊必併力於西路拒守其南路防範必然踈懈明亮等當留心探聽即可相機進勦以期得手至阿桂前奏調撥滇黔兵五千已諭催該督撫等即速料理起程其明亮所攻馬爾邦一路若竟難於攻勦或正地有可進之徑即

帶兵由彼襲取似亦出奇抵隙之一法至此路若可
進攻約需兵若干應否即用新調黔滇之兵酌量檄
知帶兵之員遵照辦理或正地雖有路徑進取無益
則又不必勉強遷就並著阿桂悉心熟籌總期於事
有益

上又諭軍機大臣曰明亮等奏稱攻取喀咱普等處奎
林和隆武奮戰受傷阿爾都珠爾格德超等出力等
語阿爾都於至險地方衝冒樹林越溝登山奮戰奪

取賊卡殺敗賊人以通奎林帶兵之路珠爾格德見賊來砍奎林隨即射斃兩賊并將其餘擊敗此次若非阿爾都珠爾格德則奎林之兵及奎林甚屬可危其功非尋常奮勇打仗者可比著從優加恩俱授為頭等侍衛阿爾都賞給雜爾沁巴圖魯名號珠爾格德賞給札克布巴爾魯名號照例各賞銀一百兩仍賞給小荷包各二個以示朕嘉愛之意奎林和隆武帶領官兵鏖戰殺賊受傷洵因感激朕恩黽勉出力

深堪嘉尚奎林和隆武各賞玉韞一枚小荷包三個
明亮富德此次亦甚勤勞明亮著賞玉韞一枚小荷
包四個富德著賞玉韞一枚小荷包三個

臣等謹案南路官兵由喀咱普下壓斯第迫於
險阻幾困重圍仰賴

聖主如天之福得以出險就亨雖殲賊甚多而我兵間
有受傷礮卡未經克取凡在行間方深慙憤乃

蒙

皇上軫念將佐軍士奮不顧身鼓勇敵愾均荷

錫予渥恩從優錄敘

溫綸所被有不感涕交零益思踴躍圖報者乎

同日明亮富德又奏言查此時自大營至格藏橋
一帶後路駱駝溝最為扼要其自卡卡角臨河起
至東北穆谷橫斜四十餘里自穆谷右山梁旋迴
絨布馬奈五十餘里山勢綿延皆不得不逐層防
範如本月初八日雨雪大作據札爾桑具報將至

四更約有賊番百餘人復從庚額特了口直撲穆
谷前敵我兵早有准備放鎗抵禦而各路接應官
兵同時並集賊人當即潰散計我兵受傷八名而
賊人是夜死亡甚多此等伎倆固久無所用然在
我設施自難稍涉大意臣等現奉

諭旨派令成果速往章谷同桂林籌辦留防諸事仰見
聖謨廣運無慮不周第查該處雖東至僧格宗西至草
布什咱又西北所通巴旺格藏橋為各路總匯之

地屯積重糧然就形勢而論其地去賊境甚遠即
欲窺伺而東西左右數百里之外皆有重兵控制
是章谷實在腹內賊番斷無從竊發其間惟僧格
宗科多實為西南兩路關鍵目下總兵海明未到
坐鎮乏人查成果在軍營已久熟悉情形似應令
在僧格宗彈壓俟海明到日應派何處駐扎再行
札商阿桂調用奏入報

聞

同日

上諭軍機大臣曰前因阿桂奏請調貴州兵二千雲南兵三千就近前往協勦以期迅速歲功當經傳諭該督撫上緊妥辦今思貴州與川省接壤程途尤為密邇著圖思德即將所派兵丁令將弁等帶領剋日起程星速遄行至黔兵分撥間日就道後所調滇兵亦可陸續進抵黔境圖思德在彼即可速為照料令其以次登程至滇兵啟行時亦應量其距黔省近者在

前遠者在後庶均不致耽悞並著李湖上緊料理并
令飭知帶兵之員起程後惟聽阿桂檄文調赴何路
即速遵調前往勿稍稽滯

辛巳富勒渾王進奏言現今大兵屢經克捷乘
勝進攻賊番當窮蹙之餘轉不無妄生窺伺滋擾
後路糧臺勢所難免况拏獲賊番納爾吉供有惡
人偷放夾壩等語此時該番等祇以布朗郭宗一
帶為我兵後路是以時來破碣等處潛行驚擾若

知改由楸砥運供則附近大板昭各臺不能保無
他慮是此一帶更須加意防範臣等查薩拉地方
距大板昭一站為楸砥軍糧軍火出口總匯之所
駐兵二百餘名實屬單弱即明郭宗一處為西南
兩路要隘駐兵二百餘名亦屬不敷守禦公同商
酌現在別無可調之兵適准文綬抄寄摺稿有又
於內地存營兵內酌派二百名前往雜谷草坡分
駐等語查雜谷草坡兩處均係附近口內地方非

如薩拉布朗郭宗實當扼要者可比自應將前項
兵丁移駐以資固守臣等隨將派往雜谷兵一百
名即由楸砥前赴薩拉防駐派往草坡兵一百名
即由臥龍關前赴明郭宗防駐似於防守機宜均
有裨益奏入

上諭軍機大臣曰富勒渾等奏查辦夾壩一摺所辦尚
妥據稱拏獲賊番納爾吉供稱金川派二十人至功
噶爾拉頭人莫撒斯處連其所帶八十餘人同放夾

壩昨初六日三十多人在破碇放過一次搶得驢頭
胡豆等物現在頭人商量要做皮舡六十個分路渡
河搶劫此處擬派頭人色丹巴沃雜由麻勺渡河圖
搶明郭宗一帶糧臺再搶木波營卡并聞衆頭人商
量若能搶據後路則將軍一路官兵就可退回稍緩
等語此事甚有關係所稱色丹巴沃雜似即丹巴沃
雜爾其人甚為可惡看來金川跳梁諸事由其主謀
者甚多此次欲思窺伺後路亦因上年木果木得手

遂復萌其故智伊既思潛至小金川地方密謀滋擾不可不實力嚴防即如前此喇嘛寺地方有賊匪四五十人分為三股以兩股搶劫糧臺一股搶奪買賣街經護軍校舒隆阿督兵堵禦賊始遁去其布置似皆丹巴沃雅爾所為蓋其人甚有計謀且曾趕及莎羅奔郎卡之時故能慣施奸狡伎倆現在夾壩雖屬無多安知其非由少而多漸為嘗試因以覘我兵力如何今年之兵較昨年自為整頓但究係綠營士卒

不甚足恃惟在駐守大員時刻留心提策方不至於
踈懈况賊人所放夾壩之處俱係軍營後路而大板
昭尤為緊要著富勒渾常青於明郭宗至大板昭一
帶不時往來稽查隨地隨時妥為措置毋稍踈虞此
時海明已至僧格宗計旺保祿亦可即抵美諾均著
一體留心照料勿滋貽誤至現在阿桂等西路糧運
已改由楸砥新路明亮等南路糧運應由章谷一帶
經行與明郭宗破礮等處無涉此等地方不應復設

糧臺轉引賊番窺伺至於駐兵防守亦應於緊要處
所如大板昭布朗郭宗明郭宗美諾僧格宗等處地
方各留多兵駐扎其餘零星碉卡分駐綠營既不足
以資捍禦畧見小賊即易涉驚惶是分兵守卡於事
實為無益莫若將無關緊要之小卡歸并大營使聲
壯勢盛既於防守得力設有巡查搜勦之事需兵數
百亦可無俟遠求方為妥善所有改并駐防事宜著
富勒渾常青悉心會籌札商阿桂妥協酌辦設或現

有之兵分撥諸要地尚有不敷之處富勒渾不妨酌
量少為添撥一面辦理一面奏聞

平定兩金川方略卷九十三

欽定四庫全書

平定兩金川方略卷九十四

四月壬午阿桂豐昇額色布騰巴爾珠爾奏言查
谷噶一路自官兵得羅博瓦勢據建領三面皆可
進搗但喇穆喇穆之賊尚未潰散分頭防堵難免
多分兵力自羅博瓦山岡之下賊審木城石碕亦
可奮力搶佔但該處箐林深密而賊又恃遜克爾
宗為之犄角互相援應從此攻撲亦不無多損官

兵^臣等公同籌議喇穆喇穆山溝本為從谷噶進

取勒烏圍正路現在喇穆喇穆之賊因與勒烏圍
有路可通拒守甚嚴然羅博瓦對面山梁即係喇
穆喇穆後路此一道山梁迤邐而西南已距勒烏
圍不遠賊人運送口糧火藥均須經由于此而山
梁下截拉枯喇嘛寺之上為日則了口尤係賊人
往來要路若從羅博瓦發兵突往佔奪則山溝深
箐內或有小路可通而賊已難於久據但官兵搶

佔此處各處賊人又必悉力前來救援臣等擬分兵六隊一隊進攻別斯滿了口對面第一等第二礮卡一隊由淖爾進攻第三大礮一隊進攻相近薩斯嘉赤溝底之礮而此一條山腿上排列之各礮內有相距尚為稍遠者擬派兵兩隊遮運由山坳箐林斜上以擣其虛而另選精銳各兵從羅博瓦下溝攀附上山直攻喇穆喇穆之後官兵分頭搶撲賊必分頭守禦乘其慌亂由羅博瓦進攻之

官兵直前奮迅而登直搶日則了口礮卡自可望
其佔據一經佔此則不但格魯瓦覺各寨皆係平
礮已歸掌握而喇穆喇穆賊人火藥口糧難於接
濟當必不攻自竄臣豐昇額業抵谷噶所帶官兵
亦于十七日全數到來雖此間自十四日以來連
日雨雪甚大但究係春深消融尚易臣等現在部
署已定一俟兩三日晴霽即可分路奮攻

同日阿桂色布騰巴爾珠爾又奏言查二月間梭

磨土婦卓爾瑪卓克采土司甲噶爾布木乃均遣
其頭人前來懇請執照又三月初間綽斯甲布土
司雍中旺爾結亦遣頭人懇給執照為憑情詞甚
為懇切臣等當即准其所請給與校磨執照以卓
爾瑪雖係土婦夙知恭順現又添派土兵實心報
効校磨土司從前所管地方百姓自應卓爾瑪子
孫世管若能助力勦洗金川更必承受重恩又
給與卓克采執照以甲噶爾布木前此尚無抗違

情事此番攻勦又能多派土兵助勦惟有分付頭人百姓令其真心出力自不致干譴責又給與綽斯甲布執照以此番大兵進勦土司母子雖與金川親戚並不存心瞻顧今歲以來相機勦殺更為出力嗣後仍須鼓勵土兵實心攻勦自有重恩並將發給執照之意詳悉曉諭各頭人等均欣喜而去

同日阿桂豐昇額色布騰巴爾珠爾又奏言

臣

等

公同商議令臣豐昇額前來谷噶併力辦理茲於

十三日臣豐昇額來至谷噶隨上新得羅博瓦山

梁察看形勢甚為高險官兵所佔均係要路且相

離勒烏圖賊巢亦近較從別路進兵實更得勢已

將達爾扎克一路之兵酌留五千餘名派五岱書

麟等率領固守以牽賊勢挑出勁兵四千餘名派

得力之侍衛章京分隊帶來以資合力進取均奏

入

上諭軍機大臣曰阿桂等奏擬從羅博瓦對面山梁分
兵為六隊進攻乘勢佔取日則了口一摺其所籌甚
好佇盼捷音又另摺奏梭磨土婦卓爾瑪卓克米
土司甲噶爾布木及綽斯甲布土司雍中旺爾結均
懇請執照並准所請給予諭以實力報効等語該土
司等隨征已二三年至今始請執照自是震懾兵威
知金川必就滅亡故乞此以為將來免禍邀恩之券
阿桂各如其意發給以釋其疑而收其力甚合機宜

更當諭以爾等得受執照即與內地武員劄付相似嗣後如益加奮勉俟大功告成後奏聞大皇帝必加重賞並當令爾等輪班朝覲筵宴加恩如此則該土司等自必更知感激至現在豐昇額帶兵四千餘至阿桂軍營聲勢甚盛分路進攻自為得力但兵貴先聲若令賊人知我又續調雲貴精兵將次到營更足使之喪膽不妨于軍營及後路各處令屯土兵練共相傳布以現又調有雲貴勇銳官兵數萬四月內即

可到營添此新兵合力進剿成功更易賊衆聞之自必更生怖畏即滿漢官兵聞此說亦必更加踴躍將軍等均應努力為之

同日

上諭內閣曰阿桂查奏額魯特馬甲哈爾察海行走勤奪而攻取羅博瓦賊碉時直至碉根拋擲火彈焚燒賊衆右腿得有鎗傷更為奮勇等語哈爾察海著加恩補授藍翎侍衛賞給彌爾古特巴圖魯名號仍照

例賞銀一百兩以示鼓勵

同日阿桂色布騰巴爾珠爾又奏言小金川降番頭人僧格告稱我等小金川番人兩次受

天朝不殺之恩無可報効誓必帶領降番將羅博瓦山峯內緊要碉卡奪取以見出力之意又稱我家口

蒙恩安插乾堡地方倘或打仗身亡只求照顧我家口不至飢寒等語即帶降番突入大石卡內砍殺多人又復合攻大碉並刨挖碉根施放火彈遂

致中鎗陣亡當即賞銀一百兩付給其家以資養贍并免其妻子差使奏入

上諭軍機大臣曰據阿桂等奏僧格以小金川降番能知感恩報効奮勇損軀甚屬可憫雖經阿桂即時賞恤思之尚可憐惜著傳諭阿桂查明僧格共有幾子視其稍有出息者即行奏明送京候朕加恩賞給官職以示優恤降番之意並將此宣諭衆番俾知朕於感恩效死之降番雖其身歿尚且錄用其子使現在

者踴躍圖功未來者聞風歸附亦可為招致降番之一助

臣等謹案疆場士卒効命損軀原屬分誼當然至若新降番衆甫經安集隨營效用實難望其與內地軍營同心合力奮勇前驅我

皇上於新附番人倍加體恤僧格以小金川降番感激天恩矢願効死捐糜弗惜

臣

阿桂等仰體

聖心於僧格陣亡時賞給銀兩免其差役已加存卹

乃蒙

皇上矜體深仁特頒恩諭復令查明其子送京錄用是以絕微愚蕃聞風感動爭先懍附凡在戎行無不說以忘死也

同日郝碩奏言督臣富勒渾前往底木達明郭宗

一帶巡查令臣暫駐大板昭彈壓臣即於本月十

二日赴大板昭駐劄並辦一切茲查大兵已攻克

羅博瓦焚燒得斯東寨從此乘勝直進自當所向

無前令副將軍豐昇額復帶兵五千名陸續赴營
兩軍會合兵威益壯雖需用糧米比前較多而現
在軍營存貯之米有三千餘石自梭洛相古至瑪
爾當各站共存米五千餘石揪砥新站滾運米每
日均有三四百斛其長運米石亦已有四百餘斛
至大板昭嗣後源源接濟軍食自為充裕至目下
將軍阿桂擬欲派兵遠路攻勦賊巢而兵丁裹帶
口糧急需灰麪四五萬觔

臣

亦已飭各站員採辦

灰麩四萬三千觔運營足敷兵丁裹帶之用奏入
報

聞

甲申五岱奏言派往谷噶兵四千名臣接豐昇額
來扎即令總兵官達色三等侍衛普濟保參領富
爾賽等帶領起程今本處所存官兵自後路孟拜
拉至薩爾赤鄂羅駐兵七百名令副將佛遜管理
自薩爾赤鄂羅至拉布山駐兵四百名令副將西

德布管理所有達爾扎克莫爾敏等處共駐兵二千一百餘名令領隊大臣書麟等管理達爾扎克山梁後溝並新佔達爾雜木班雜爾山梁派兵六百名令侍衛伊達里管理接連後路駐劄其凱立葉山峰三卡臣領兵一千七百餘名相度地方安設駐守三月十二日亥刻有賊三百餘名來擾班雜爾南邊卡座官兵放鎗拋石奮勇擊殺而駐守班雜爾山梁官兵又由賊後路衝擊賊見斷其歸

路隨向下敗遁計殺死三十餘人十八日賊又來
衝班雜爾山北卡座卡兵正與相持前鋒平保領
兵接應截殺賊亦隨即奔走奏入

上諭軍機大臣曰五岱將凱立葉一路所餘之兵丁分
駐防守並兩次擊賊衆甚屬可嘉凱立葉一路雖暫
不能深入然嚴守地方實為緊要如稍不留意以致
失利於賊於全軍聲勢關係匪輕將此傳諭五岱嚴
飭各處官兵晝夜嚴守如遇賊人攻劫務須互相救

援痛加殲戮即賊畏懼不來亦不可經時坐守蓋我軍分路前進賊衆豈有不知必將凱立葉賊番撥於將軍阿桂等軍前救應五岱不時派兵攻取可以分奪其勢只不可傷損我軍耳至阿桂處消息尤當時刻探聽如彼處得利五岱亦可相機直入并將此論阿桂知之

丁亥富勒渾郝碩奏言今礮砥餉道開通所有後路臺站糧運應撤應停即宜查明酌辦查瑪爾當

內有各臺站原屬西路軍營糧道今揪砥新路既已暢行而長運滾運之糧亦經漸次到站且自薩拉以至谷噶存米一萬餘石足敷一月有餘加緊陸續轉輸即可日形充裕其瑪爾當至明郭宗各站自應裁撤以歸節省並免疎虞其應裁各站現存之米以及運到軍火除酌留附近防兵一月支周之外餘俱限日運完事竣即行裁撤至一月之後其防駐明郭宗帛噶爾角克礪一帶官兵成就

近由美諾支領或就近由鄂克什支領其防駐布
朗郭宗至瑪爾當一帶官兵即由薩拉支領均屬
省便其西南兩路大檄來往俱交會哨兵丁以次
接遞無庸另設馬臺且此一路既不安設糧臺則
客民等無從聚集雖逼近賊境處處易於出沒而
賊藪既無所圖自不肯潛來驚擾再前因趕運日
隆等處存糧每站安夫七八百名至一千餘名不
等今此路既經裁去糧臺合計八站約共應裁夫

七千餘名此項人夫除已滿站者均令回籍其甫
經到站領過安家銀兩者酌分附近各站加緊趕
運揪砥米石則糧運既可藉以日盈而夫價亦不
致於虛耗一經大兵攻至勒烏圍移營前進即可
就近抽調安設新臺更可免內地派撥之煩至北
路糧運臣等悉心籌酌指日攻抵賊巢凱立葉宜
喜官兵均可會集則糧石俱應由揪砥一路運供
是卓克米之糧尤可不過於多貯臣等已咨明文

綬斟酌籌辦

同日富勒渾鄂寶奏言副將軍豐昇額既帶兵四千五百名前赴谷噶會勦所需糧石自應即由梭洛栢古一路運供其凱立葉留駐官兵數已減半需米較少所有自卓克米至凱立葉七站人夫亦應裁減查腊覺溝一站山險路長原安夫六百名其孟拜拉色木多薩爾赤鄂羅雪山根布拉咱斯丹達爾札克等六站均原安夫四百名今酌加裁

汰脂覺溝應減夫三百名餘各減去二百名共應
裁夫一千五百名俟揪砭糧運充盈再將凱立葉
軍糧併入西路由梭洛柏古分運色木多而腊覺
溝孟拜拉等站均可裁撤至北路宜喜軍營各站
存米不下萬石約敷兩三月之需以後軍糧既應
緩為運送則夫力自未便虛糜除卓克采至宜喜
十六站人夫甫經裁定毋庸另議外其自揪砭至
卓克采十三站每站設夫四百名未免稍多今每

站各應裁去二百名共應裁夫二千六百名所有
前項裁減人夫如有應添之處酌量派撥若無需
用令其各回原籍以歸節省均奏入

上諭軍機大臣曰富勒渾等奏酌停糧運所辦可嘉軍
糧既由楸砥新路轉運其瑪爾當至明郭宗各站自
不應復設糧臺前已降旨令富勒渾等即籌裁撤今
富勒渾所奏與朕前旨適合蓋其地既非糧運正道
所經即不須多有官兵防設若仍安設糧臺徒予賊

匪以窺伺劫竊之隙於事轉無益而有損昨冬阿桂不欲於此處安兵設站想亦是此意至阿桂會同豐昇額現在統兵深入攻取勒烏圍賊首等自應合力拒守未必能復在小弁地方滋事但富勒渾常青不可因此稍涉大意凡關係軍營後路總須嚴密固防設間有零星夾埧亦必須工緊追勦方為妥善

戊子阿桂色布騰巴爾珠爾奏言臣等按富勒渾等摺稿稱三道灣喇嘛寺等處均有夾壩又稱挈

到小金川賊番訊知此路賊酋現派頭人丹巴沃
咱爾莫撒斯欲搶明郭宗木波一帶糧臺及翁固
達卡座隨即派員嚴加防範等語查現在大兵分
路進攻賊番斷無餘力更為截後之計不過小金
川番人投在賊境不給口糧令其伺間搶掠以駭
官兵聞聽如能搶得糧臺便可糊口此等窮番不
過如竊盜臨時行強之比若各糧臺嚴緊賊人來
無所得勢斷不能佔住金川賊衆本好為大言以

欺番衆且因上年木果木之事亦從木波等處分
頭截搶又不知此時西路大兵後路已從楸砥往
是以仍為此語而小金川番人等輒信其狂吠據
為供吐至丹巴沃咱爾係金川主謀第一大頭人
該賊弟兄所不可離者前此谷噶官兵攻至萬分
要緊丹巴沃咱爾始行親自前來希圖截後此時
斷無有帶數十醜徒窺伺明郭宗之理此等供詞
不待辨而可知其妄但恐該督等未悉情形偶有

零星賊衆驚恐張皇紛紛調撥自行擾亂轉使賊人得以乘機而入臣等即行知常青等以此後駐兵地方飭令弁兵高壘深溝晝夜巡防毋稍疎懈倘有賊衆前來其本寨之將弁督兵丁堵禦其餘附各卡應接應者分兵接應應自守者列兵嚴守萬不可因一處有賊盡撤他處官兵救援轉有空虛之虞致為賊據即如賊番供內有搶佔明郭宗之語如賊果至明郭宗其上阿爾圖之兵即可憑

高堵禦而又令美諾防兵星往合勦賊番自將逃
竄不暇計復安施況南路之後早已移在章谷打
箭爐一帶而西路之楸砥現已大通文報輓輸從
此經行均為近捷昨富勒渾親往布朗郭宗等處
將一帶糧臺酌撤嗣後賊人益復無從窺伺自必
漸為寧謐

同日明亮富德奏言總兵海明已於本月十四日
前抵僧格宗茲據稟稱十八十九日夜間有賊在

僧格宗默資溝等處搶劫客貨當經派兵擊散並
請添撥防兵等語查小金川地方自科多約咱綿
亘二百餘里豈能密布多兵惟在扼其要害結營
固守則現在兵力足資防範即遇有賊至不過三
四十人輕入重地正可斷其去路盡力殲誅海明
甫經到營未免過於謹慎臣等當將守禦機宜及
未便易置防兵致有顧此失彼之虞俱已詳細指
示均奏入

上諭軍機大臣曰阿桂等奏丹巴沃咱爾係金川主謀
第一大頭人該賊酋兄弟所不可離者此時斷無轉
領有限醜徒窺伺明郭宗之理等語與朕昨降諭旨
適合所見實為有識至所稱恐該提督等未悉情形
偶有零星賊衆即驚恐張皇紛紛調撥自行擾亂使
賊人得以乘機而入等語尤為扼要此一節交富勒
渾旺保祿常青妥協辦理又明亮奏僧格宗尚有賊
番搶奪傷斃民之事海明欲抽調他處防兵添駐僧

格宗等語此等夾填不過小金川窮番或賊酋遣其
外出既省賊中養贍之煩兼為我軍後路之擾實屬
可惡各該提鎮等一聞此信即速追殲毋使竄逸若
賊番屢受痛懲自不敢復出滋擾至各處防守事宜
前曾有旨交阿桂等酌將零星碉卡之兵歸併扼要
地方駐守不致兵勢以分而見少阿桂等自必遵旨
妥籌各該提鎮惟當靜聽將軍指揮勿思輕易更調
至賊匪每出必傷害客民皆由客民等負戴散行遂

致誨盜此等地方既非糧運所經自不能多有官兵
在途照應客民背夫怯懦之人一見賊影即懼而奔
逃轉致賊人攫取得利是此等地方因有人經行而
招賊莫若禁其勿由此路往來設或有必須經過者
亦當令相約合併而行並各自為防護使人數衆多
賊自不敢潛出滋擾富勒渾等當實力妥為之至明
亮等前奏官兵攻壓思紐等處和隆武得有鎗傷兩
處奎林背亦受傷深為繫念明亮等此次奏出竟無

一語提及不知兩人傷痕近日曾否向愈此等出力之領隊大臣乃朕所廩懷弗置者明亮等何不知善體朕意著即速覆奏以慰懸注

辛未舒常奏言三月二十一二兩日天氣漸霽土司雍中旺爾結及土舍頭人來營據稱我受

大皇帝深恩無以圖報今莊稼大半種完調得土兵二

千餘名情願親自率領進攻

臣

隨依所請抽撥官

兵於二十三日夜令赴宜喜聽候撥用土兵分為

四路進攻達爾圖頭二三四各碉

臣

令提督馬彪

等領兵四百名合攻頭碉烏爾圖納遜等領兵四

百名合攻二碉侍衛進財保等領兵四百名合攻

三碉叅領全保等領兵四百名合攻四碉乃時至

三更復降大雪至二十四日丑刻稍止即乘陰霧

迷漫發兵前進賊已知覺鎗石齊發且冰雪滑溜

各兵不能蜂擁齊上

臣

見時已天明賊衆漸增恐

土兵傷亡過多致挫銳氣隨諭土司撤兵而該土

司尚欲前進曉諭再三始遵將兵撤下此次受傷
陣亡漢土各兵查驗分別等第照例咨部賞卹臣
思雍中旺爾結尚在幼年即愿領兵出力此皆
聖恩所感嗣後遇有可乘之機寔可望其濟事

同日舒常又奏言土司雍中旺爾結面稟三月二
十一日由金川地方逃出兩人一係金川番人察
爾結一係綽斯甲布番民山札爾結前被金川掠
去賣於小金川地方令隨僧格桑竄入金川受苦

不過乘空逃出山札爾結原是土司百姓求賞給
收領至金川番人亦係誠心投順望求免死等語
臣隨諭以投順與拿獲不同原可免其一死如能
擒獻頭人更當重加賞賚爾土司可將此意令頭
人喊諭金川番衆知之據土司覆稱金川人生性
多疑今兩人既蒙不殺自必信服來投臣已將此
二人即照所請交伊收管均奏入

上諭軍機大臣曰緯斯甲布土司雍中旺爾結誠心出

力甚屬可嘉着賞銀一百兩以示獎勵仍將朕御用之大荷包一對小荷包四個隨報寄發令舒常賜彼用昭優異俾其益知感奮至此次土目土兵傷亡稍多殊覺可憫並着照例加倍給賞至舒常見賊衆守禦甚緊恐土兵徒傷無益體恤曉諭至再土司始聽從撤回深合駕馭外番之道伊等見叅贊大臣如此矜憐愛護益足勵其勇往之忱舒常所辦甚合機宜又奏降番二人俱貸其一死自行投出與打仗擒獲

者不同罪尚可原若有能縛獻賊頭賊目者并即奏
聞重賞使金川賊衆見而心動若果聞風接踵來降
亦足渙散賊勢於軍務不無小補各路將軍不妨照
此辦理

丙申明亮富德奏言總兵海明於三月二十八日
在僧格宗因病身故查僧格宗一帶地方緊要近
日賊人屢有夾埧察其舉動不過小金川未投各
番竄伏深山伺便偷劫惟在設法勦洗立可淨盡

現在河北各要隘雖有將領把守未足深恃急須
另派幹員彈壓臣等再四商酌查有鎮遠鎮撫兵
教成堪以派往隨將留防後路事宜詳細告知即
令尅日起程前往駐守奏入

上諭軍機大臣曰教成昨來京陛見朕細觀其人帶兵
打仗自為得力若令獨當一面隨宜調度恐非其所
長況明亮等一路帶兵大員亦少教成應留於明亮
軍營備用其僧格宗防守之事已派汪騰龍嵩辨並

令痛加改悔若再端尚口給不肯實心出力即難保
全首領想彼亦當稍知敬畏但其地究不可無總統
之人桂林現駐章谷且曾在南路統兵地利既所深
知而人情亦易於呼應著傳諭桂林不時往來僧格
宗一切留心照料有應措辦機宜即面交汪騰龍實
力妥辦如見有虛浮不實之處即據實叅奏

壬寅阿桂色布騰巴爾珠爾奏言伏查西南兩路
官兵已漸逼其巢穴賊情窘迫是以悉其醜類節

節負嵎即如近有出來之兵丁番婦等稟稱賊酋
因格魯瓦覺一路官兵攻打甚緊不但莎羅奔兄
弟皆帶兵親來抵禦並索諾木及其姑阿青等均
來遜克爾宗是其螳臂當車實已不遺餘力現蒙
皇上添設官兵若更另開生路攻其不意賊勢愈分愈單
自可速期得手臣等查此時未進兵之各路惟正
地一處自進勦以來從未經大兵攻打比之他路
賊首預備稍疎前此業經

聖明垂詢並經明亮奏覆稱由正地直搗中堅洵為制勝良策訪之能事頭人咸稱至善等語是南路分

兵由正地前進實為得濟

臣

阿桂前亦籌議及此

核計霍爾部落如德爾格各土司尚可派土兵四五千人若再得漢兵五六千人即可敷一路之用

查南路軍營於去年八月間已添滿漢各兵四千五百名至去冬及本年正二月內又添楚兵三千雖章谷等處後路駐兵約有三千但抽出二三千

名自無不可至新調滇黔兵於內撥往南路二三
千又加以吉地等處本有駐防漢兵一千餘名則
已有兵五六千人再將德爾格特土兵限以時日
酌調前來漢土各兵合計萬餘即可敷一路之用
但近日正地情形相距寫遠無從深悉業於奉到
諭旨時即密扎明亮等囑其熟籌具覆至綽斯甲布一
路亦係賊所深護現今雍中旺爾結及其頭人等
節次多派土兵奪碉殺賊若將派往正地所餘滇

黔兵丁添入綽斯甲布軍營合勢攻擊亦必倍為
有力惟是軍營情事隨步換形本難懸定約計此
項調撥官兵到營尚須四五十日而喇穆喇穆一
路雨雪連綿茲已於初八日見晴雖賊乘雨雪之
際又有增添碉卡而此時務期必克俟兩三日晴
霽即當竭力進攻得有一二勝仗即可進抵勒烏
圖若滇黔官兵將屆出口時此間已有必克賊勦
之勢臣等擬將此項官兵調赴西路厚集兵力迅

期殄滅奏入

上諭軍機大臣曰阿桂等奏初八日天已放晴俟兩三日後即督兵竭力進攻又稱若欲別開生路則惟正地一處預備必疎等語自應如此籌畫看來各路進勦大局惟阿桂一路實有可以進取之機若已攻得遜克爾宗或直抵勒烏圖則兵力愈多成功愈速現在黔兵已於四月初旬陸續出境滇兵亦報起程竟當將此滇黔兵五千即速全數調往以冀尅期集事

設或谷噶一路急切未能深入則又不宜專事株守
計正地一處從未攻勦賊人未必預防若調滇黔官

兵二三千遠赴正地添派德爾格特土兵令明亮統

領攻勦可望得手其馬爾邦一路則令富德留駐以

牽綴賊勢亦屬正辦着傳諭阿桂即密扎明亮等妥

商酌行

平定兩金川方略卷九十四